

富順縣志卷之二

建置沿革志 圖考附

華陽黑水實為梁州庸蜀盧微從王於周崎嶇隔絕用啟秦

謀五丁開峽詐售金牛自秦逮漢江陽著名兩晉五代唐宋

元明為州與監沿革屢更析置隆邑同隸郡城志建置第二  
唐虞為梁州域歷夏商不改周既代殷監二代而損益以雍為王  
畿梁在雍西故合梁於雍周禮職方九州無梁時為庸蜀巴濮之  
地秦時地介巴蜀二郡之間漢高帝分巴置廣漢郡建元六年武  
帝分廣漢置犍為郡領縣十二江陽郡屬焉江陽即今瀘州

華陽國志蜀志曰武帝分廣漢置犍為郡巴志又曰高帝分巴  
置廣漢郡武帝又兩割置犍為郡故世曰分巴割蜀以成犍廣  
知江陽在秦時介巴蜀之間也漢地里志曰犍為郡建元六年  
開華陽國志曰元鼎六年置犍為郡非也春秋傳曰水北為陽  
說文曰水南曰陰江陽以在江北得名其地南以江為竟江之  
南漢安縣符縣地也北接資中西接南安犍道縣東接巴郡  
東漢因之建安十八年劉璋分犍為立江陽郡縣改屬江陽

華陽國志曰江陽郡本犍為枝江都尉地水經注作 漢書地

里志犍為郡漢陽縣班氏自注云枝江都尉治是也今漢書俗

本脫去枝江二字漢陽縣漢改爲漢安縣華陽國志曰建安十八年漢安程徵石謙白州牧劉璋求立郡璋聽之以都尉廣漢成存爲太守屬縣四江陽漢安符縣新樂建安十八年置江陽郡華陽國志水經注皆同舊志云建安六年誤也

蜀漢江陽郡地晉氏因之

劉璋及蜀漢時江陽郡在漢安縣今之江安縣也晉移郡治於江陽屬縣三江陽縣符縣江安縣水經注曰漢安縣江陽郡治也言劉璋初立郡時也華陽國志曰江陽縣郡治言晉制也

五代劉宋屬江陽太守

富順縣志

卷之二

建置

二

宋失江陽郡寄治武陽沈約州郡志曰江陽漢舊縣

齊梁東江陽郡地

後周武帝析江陽縣置富世縣治卽今縣治也又於縣置雒原縣隋開皇初郡廢大業初富世縣屬瀘州郡

攷梁置瀘州治馬湖江口以馬湖江卽瀘水故曰瀘州也後移治江陽而仍舊稱爲失其實矣隋地里志曰瀘川縣舊曰江陽漢江陽縣兼有今之瀘州富順縣隆昌縣地自後周析置富世縣而隋氏因之爲瀘川富世二縣同隸瀘川郡

唐初屬瀘川郡武德四年置來鳳縣武德九年省來鳳縣入焉貞

觀二十三年更富世爲富義縣屬劍南道瀘州瀘川郡  
華陽國志曰江陽縣有富義鹽井唐時取名本諸此攷富世富  
義卽今縣治而元和志曰富義鹽井在西南五十步則當時縣  
城自有鹽井非今日之自流井富義廠也

宋乾德四年以縣掌煎鹽升爲富義監五年縣廢太平興國元年  
避太宗諱改曰富順監置富順縣屬隸潼川府路熙寧元年縣省  
嘉熙元年監廢尋復置咸淳初徙治虎頭山廢縣爲監治平初置  
富順縣熙寧初罷元至元十二年復於舊治置富順監安撫司二  
十年罷安撫司升爲富順州屬敘州路而總於四川行中書省

舊志作湖廣行中書省誤也

明洪武四年改州爲縣屬敘州府編戶九十一里隆慶四年析置  
隆昌縣 國朝因之康熙二年丈畝編戶六里三十年改爲四鄉  
八路